

ԻՄ «ՆՈՒԱԳՆԵՐ» ԻՑ

* * *

Իմ հարազատ , հէգ եղբայրը
Հառաչում էր ու լալիս .
Նա յուսահատ հեկեկում էր ,
Թշուառ գլխին վայ տալիս :
Նորա դառն տանջանքներից
Սիրտըս ցաւեց ու այրւեց .
Նորա ողբից լոյս-երկինքը
Գլխիս մթնեց , խաւարեց :
Խնդրեցի քեզ , չքնաղ Փերի' ,
Որ վշտերըս ամոքես .
Աղաչեցի , որ քո սիրով
Իմ ցաւերը ըսփոփես :
Բայց , օ՛ անգո՛ւլթ , դու մնացիր
Լեռ քարի պէս անտարբեր .
Սառնութեամբըդ ցաւիս վերայ
Աւելացրիր նոր ցաւեր :

* * *

Երբ լուսինը գեղած ծաղ`
Ամպերի մէջ լողալով ,
Հանդարտ ու վեհ ընթանում էր ,
Արծաթի պէս շողալով —
Պատշգամբում , գետի ափին ,
Նստած էինք երկուսով :
Ոչ ոք չը կար : Գեղ լուսնեակն էր
Միայն ներկայ իւր լուսով :
Դու հիացած , ուրախ , զըւարթ`
Նայում էիր երկնքին .
Իսկ ես տխուր նայում էի
Հրեշտակային քո դէմքին :
Նւ այդ դառն տանջանքներիս
Խորհրդաւոր գիշերը
Ուղում էի մի վարդ քաղել ,
Բայց ծակեցին փըշերը . . .